

後

漢

書

疏

證

後漢書疏證卷八

吳 沈欽韓撰

左雄南郡涅陽人

郡當作陽

稍遷冀州刺史

北堂書鈔謝承書曰雄爲冀州刺史不舉煙火長食乾  
糲十日一炊

容容多後福

新序一諂諛之人容容在旁說苑臣道容容乎與世浮  
沈上下越絕計倪內經衆人容容盡欲富貴

分伯建侯代位親民

按此與上皋陶對禹語文義不屬袁宏紀云昔三代垂  
統封建侯伯云云則辭義爲順蓋范史刪截東京文字  
與宋祁修唐書同病不必是傳寫脫落也雄此奏袁紀  
在陽嘉元年而傳置於永建三年之前

褒豔用權七子黨進

按小雅十月之交序以爲大夫刺幽王箋以爲刺厲王  
毛以豔妻爲褒姒鄭以爲敵夫曰妻正義曰鄭謂刺厲  
王者從韓詩說鄭以詩論天子之后非如曲說邪淫不  
當以色名之中候曰剡者配姬以放賢剡豔古今字耳

以剡對姬剡爲其姓以此知非褒姒也傳載左雄詩爲  
褒豔則雄同毛旨注旣言褒豔爲褒姒復云厲王淫於  
色則辭不屬矣

注 秦窆窳其士

按揚雄長楊賦作封豕其士窆窳其民

觀政於亭傳

胡三省曰郡縣長吏飾亭傳以夸過使客監司亦以是  
觀政也愚謂監司按部但一過亭傳而已未嘗深考其  
治狀也

職斯祿簿

斯與廝同易旅初六斯其所取災王弼注爲斯賤之役  
北堂書鈔蔡邕書云大官令職役斯碎非文雅所使也  
不滿四十不得察舉

此古者四十而仕之義也冊府元龜六百三十九宋文帝元

嘉中限年三十而仕孝武卽位仕者不復拘老幼南齊  
習宋代限年之制然而鄉舉里選不覈才德其所進取  
以官婚曹籍爲先遂令甲族以二十登仕後門以三十  
試吏故有增年矯貌以圖進者梁初制年二十有五方  
得入仕天監四年詔曰今九流常選年未三十不通一  
經不得解褐若有才同甘顏勿限年次陳依梁制惟經

學生策試得第諸州迎主簿西曹左奏及嘗爲換郎者  
得未壯而仕此皆限年之例也

胡廣等皆坐謬舉免黜

按胡廣以被劾心恨左公故爲尙書時駁其察舉之議  
當據此傳以定其先後次第

並奏拜童子郎

北堂書鈔東觀記云陽嘉三年汝南童子謝廉河南趙

建年十三各通一經以太學初繕應召而至皆除郎中

劉芳蜀山客唐設九科童子居其一員半千楊炯  
吳通玄裴耀卿李泌劉晏皆由是舉宋則楊億宋綬晏  
殊李淑均以童子出身元童子科見於選舉志者  
十六人按李東陽四歲舉神童則明時亦有此制

大將軍梁商子冀襄邑侯

袁紀陽嘉二年四月丁丑封虎賁中郎將冀爲襄邑侯  
執金吾商上書陳讓詞意惻至書十餘上上遂聽許考  
帝紀及袁紀梁商以陽嘉四年爲大將軍袁紀於二年  
書執金吾者是

無乳母爵邑之制

冊府元龜卷三十八哀帝天祐二年九月敕孀婆楊氏可封

昭儀孀婆王氏可封郡夫人第二孀婆王氏先皇帝封

郡夫人今准楊氏例改封中書門下奏曰伏以孀婆楊氏等保持夙宵善養勞苦且

隆恩澤以報劬勞竊以事體參詳合陳管見漢宣帝乳母郭徵卿胡組著保養之功後子孫只受厚賞而無封

爵後漢安帝封孔母王聖爲野王君順帝封孔母宋娥爲山陽君其時忠正上言亦以封爵過當乃貽厥咎至晉室中興乳母阿蘇有保元帝之功賜號保聖君既非爵邑又彰其功爰擇美名在理甚當臣等商量嬪婆楊氏望賜號安聖君嬪婆王氏望賜號福聖君第二嬪婆王氏望賜號康聖君從之

舉以此劾奏雄

袁宏記詔書選武猛任將帥者雄選故冀州刺史馮直直嘗坐罪減死又無武猛驗舉劾奏雄曰詔書使我選武猛不使選清高舉曰詔書選武猛不使君選貪汙也

周舉  
傳 延熹四年

當作延光



名海言正言卷之二  
議郎陳禪以爲云云

按禪是閻氏故吏旣免阿黨之誅乃昧穎考叔之義欲  
隔絕母子何其愚而悍也

明公年過八十

按風俗通十友篇司徒九江朱偃以年老爲司隸虞詡  
所奏耳目不聰明見掾屬大怒曰顛而不扶焉用彼相  
於是東閣祭酒周舉曰昔聖帝明王莫不厯象日月星  
辰以爲鏡戒熒惑比有變異豈能手書密以上聞偃曰  
可自力也舉爲創草陳災異之變勸上親賢納忠上覽  
偃表嘉其忠謨偃目數病手能細書詡案大臣苟肆私

意詡坐上謝俚蒙慰勞按袁記朱俚以永建元年二月爲司徒十月丁亥罷而帝紀則於二年七月壬午同太尉朱寵罷若如袁紀則舉雖爲俚道地亦無多時也俚乃表諫帝果從之

通鑑考異曰袁紀永建元年秋七月有司奏浮陽侯孫程祝阿侯張賢爲司隸校尉虞詡訶叱左右謗訕大臣妄造不祥干亂悖逆王國等皆與程黨久留京都益其驕溢詔免程等徙爲都梁侯范書孫程傳亦云坐訟虞詡呵叱左右就國按虞詡傳程言見用上不以爲怒周舉傳言程坐爭功就國从舉傳愚謂程等訟虞詡叱張

防固非帝所憲譏邪尤側目一時曲從後或其懷表爭  
功三年悉徵還京師而朱倭并責前事坐斥也孫程傳  
以二年七月罷則倭諫未必效於當時此乃傳之饒糊  
平丘令

一統志平丘廢縣在開封府封丘縣東四十里接直隸  
長垣縣界長垣縣志在今縣西南五十里

有龍忌之禁

淮南要略操舍開塞各有龍忌高誘注中國以鬼神之  
日忌北胡南越謂之請龍

輒一月寒食

御覽

七十

魏武帝明罰令曰聞太原上黨西河鴈門冬

至後百有五日皆近寒之地老少羸弱將有不堪之患

令人不得寒食按此則不獨太原一郡亦不止一月寒

食賈思勰齊民要術介子推抱樹而死百姓哀之忌日

為之斷火煮醴而食之名曰寒食蓋清明節前一日也

然則僅斷火一日也陸翹鄴中記并州之俗以介子推

五月五日燒死世人為其忌故不舉火餉食非也北方

五月五日自作飲食祀神及作五色新盤相問遺不為

介子推也

御覽聚操曰介子推抱木而死文公哀之令人五月五日不得舉火此五月五日之說也

又鄴俗冬至一百五日為介子推斷火冷食三日作乾

粥是今之糗冊府元龜六十後魏太和二十五年詔介

山之邑聽爲寒食自餘禁斷周密癸辛雜識綿上火禁

升平時禁七日喪亂以來猶三日相傳火禁不嚴則有

風電之變社長輩至日就人家鷄羽翎掠竈灰鷄羽稍

焦卷則罰香紙錢有病及老者不能冷食就介公廟卜

乞小火吉則然木炭取不煙不吉則死不敢用火或以

食暴日中或埋食器於羊馬糞窖中其嚴如此又云火

禁中雖冷食無致病者按寒食節莫尙於唐雖宮禁亦

不然燭沈佺期詩所謂普天皆滅焰匝地盡藏煙者也

宋以後稍弛而綿上之禁猶如此章懷注云事見桓譚

按桓譚何能知周舉

隋唐經籍志並有華譚  
新論十卷當因彼而誤

娶閉之

憲章類編成化五年御用監左監丞龍閨娶南和伯方  
瑛妾許氏爲妻事覺上曰在昔帝王以內官給事內庭  
以其絕生道無外覲也今聞在外娶妻何異常人其卽  
離異閨仍送司禮監處治之

其後以事免司徒劉崎

帝紀陽嘉三年十一月壬寅崎與司空孔扶同免袁紀  
云以災異免

尙字伯河南郡人也

一本作河南郡人非

北堂書鈔楚國先賢傳曰黃尙爲司隸校尉姦慝自弭  
三月上己日

玉燭寶典正月元日至月晦人並爲酺食度水土女悉  
湔裳酌酒於水濱以爲度厄則不獨三月上己也宋書

禮志云漢書八月祓於霸上劉楨魯都賦素秋二七天  
漢指隅人胥祓除國子水嬉又是用七月十四也自魏

以後但用三日不以己也癸辛雜識上己當作十干之  
己蓋古人用日例以十干如

上辛上戊之  
類無用支者

經曰從祀先公

注親盡故通言先公也按此龔杜預非是喪服小記云

爲殤後者以其服服之鄭注殤無爲人父之道以本親之服服之疏云謂大宗子在殤中而死族人爲後大宗而不得後此殤者爲子也旣不後殤而宗不可絕今來爲後殤者之人依兄弟之服服之也鄭意以殤者未經傳重經云爲殤後者言殤則有爲殤服者在蓋此殤死而大宗爲大夫若士者擇族人爲後故以本服終其日月故鄭云言爲後者據承之也孔疏不善解此云旣不後殤而宗不可絕則似大宗之家惟此殤者以其殤不爲父乃越序而後其父顯與經文相背古無是禮也若殤者之父已前死殤者旣傳一日之重於是而死已有



為人父之道雖不及冠而已當冠者之事上經所云冠

而不為殤其義如此後人循疏文而不曉鄭義至有駁難不具錄也既不為殤

則來後其宗事事如子為彼殤服自依正條斬衰章云

為人後不指言父若祖兼包兄弟為後在內也公羊仲

嬰齊傳云為兄後則曷為謂之仲嬰齊為人後者為之

子也推此而言國君之親兄弟入繼大統為後之禮一

如斬衰自為昭穆兄終弟及之義不獨商家為然所以

重大宗責恩禮也僖之於閔定之於昭皆然昭公喪至乃書定公

即位朱劉徹為兄後議曰春秋之義有常有變既從子

例則僖公不得以閔公為昭歸父不得以嬰齊為

穆既正其昭穆則迭毀之次不得以杜預茂弃典禮

一代一也春秋正其為臣子一體而已

故文二年傳主僖為閔臣不為父子今即以傳證之君

子以為失禮子雖齊聖不先父又歷引禹湯宋鄭帝侂

與稷此即祭法禘嘗郊稷之謂故傳云后稷親而先帝也先儒以為天帝者非皆是言父子

繼世曾無一語及君臣以舉大自包細也杜違禮亦自

違其傳賈公彥知其非故家人疏云兄死弟及俱為君

則以兄弟為昭穆文二年躋僖公謂以惠公當昭隱公

為穆桓公為昭莊公為穆閔公為昭僖公為穆今升僖

公於閔公之上為昭閔公為穆故云逆祀也按賈言僖桓閔僖從

來昭穆之敘是也謂文二年逆祀閔與僖易其昭穆則

未必然躋僖公者直是升僖公同在昭位不別為一世  
從是以往交為穆宣為昭尺緣少若本同倫以僖公升  
僖之位一產自後世次悉亂

於閔公之上則以後諸公昭穆不亂何因至定八年始  
云順祀乎明本以僖閔昭穆別故於後皆亂也然則定  
八年經云從祀先公以昭公之上昭穆皆亂今審禘而  
易之故通言先公杜預亦云將正二公之位次所順非  
一意亦謂閔以下昭以上皆順復言親盡通云先公則  
固自怙其謬說曾不思禘祭時自有親未盡者在若非  
一一皆順豈得因僖閔而概言乎章懷此注引杜預故  
詳辨其謬

黃瓊  
傳瓊至綸氏

一統志潁陽故城在河南府登封縣西南春秋鄭綸氏

邑漢置綸氏縣後魏天安四年改置潁陽縣於此元和志隋大業元年改爲嵩故注云嵩陽縣城

不夷不惠可否之間

法言淵騫篇有李仲元者

高士傳李弘字仲元

不屈其意不累其

身曰是夷惠之徒歟曰不夷不惠可否之間也

諛謗布流應時折減者

謝承書南郡王逸素與樊英善因與其書多引古譬喻勸使就聘英順逸議談者失望

胡元安

藝文類聚先賢行狀曰胡定字元安至行絕人在喪雉

免遊其庭時雪霜滿其室縣令遣戶曹掾排雪問言定已絕穀妻子皆卧在牀令卽遣掾以乾糧就遺之定乃受半袁宏紹潁川功曹史鄭凱答太守朱寵曰胡元安體會參之至行履樂正之純業喪親泣血骨立形存精誠洞於神明雉兔集其左右出於潁陽

朱仲昭

未詳

顧季鴻

吳志注吳錄曰顧雍曾祖父奉字季鴻潁川太守

巴郡黃錯

華陽國志王堂爲巴郡太守貢孝子嚴永隱士黃錯名  
儒陳髦俊士張璜皆至大位

有作者七人之志

皇侃義疏鄭注云伯夷叔齊虞仲辟世者荷蓀長沮桀  
溺避地者柳下惠少連辟色荷蕢楚狂接輿辟言者七  
當爲十字之誤也集解包咸云七人謂長沮桀溺丈人  
石門荷蕢儀封人楚狂接輿也義疏又引王弼說與此  
注同

又覆之於端門

宋志州秀才郡孝廉皆策試天子或親臨之隋書禮志

後齊每策秀孝中書策秀才集書策考貢士考功郎中策廉良皇帝常服乘輿出坐於朝堂中楹秀孝各以班草對其有脫誤書濫劣文理孟浪者起立席後飲墨水

脫容刀至唐進士亦有覆試劣者輒落

張說永昌中武后第賢良方正

詔吏部尚書李景謨糊名較覆說所對第一后署乙等崔沔擢賢良高第不中者謗訾之武后敕有司覆試對益工遂為第一李壁王荆公詩注國朝御試因舉人徐士廉訴知舉李昉取舍不當開寶六年藝祖始親覆試於殿庭

文獻通考初開元時禮部考試畢送中書門下詳覆

按此

但以其程文送覆檢如今磨勘之例不別試也

其後中廢侍郎錢徽所舉送覆

試多不中選由是貶官

容齋隨筆唐穆宗長慶元年禮部侍郎錢徽知舉放進士鄭朗

等三十三人後以段文昌言其不公詔令中書舍人王起知制誥白居易重試盧公亮等十人貶徽江州刺史而舉人雜文復送中書門下後唐莊宗同光三年敕今年新及第進士符蒙正等令翰林院覆試升王徽桑維翰居魁亟降符蒙正第四今後禮部所試委中書門下子細詳覆奏聞開寶六年李昉知貢舉取宋準等十一人長編云進士宋準等十人諸科二十八人上以進士武濟川三傳劉睿材質最陋拙去之遂於講武殿命題重試御試自此始然於昉等所取十一人內只出武濟川一人餘十人則高下一依先次而續取到二十六人不過附名在此十人之後其爲一榜未嘗有省試殿試之分也至八年覆試



禮部貢院合格舉人王式等於講武殿內出試題得進士三十六人而以王嗣宗為首王式者禮部所定合格第一人則居其四蓋自是年御試始別為升降有省元狀元之別云至仁宗嘉祐二年親試舉人凡進士與殿試者始免黜落

燕翼論謀錄舊制殿試皆有黜落臨時取旨或三人取一或二人取一或三人取二故有累經省試取中而擯棄於殿試者自張元以積忿降元昊於是羣臣建議歸咎於殿試嘉祐二年詔殿試皆不黜落按此則嘉祐以前御試皆漢覆試之遺法也今則會試榜出中式者亦令入內覆試而無黜落惟磨勘則有停殿試者

以宜比周公

劉云當作宜以按袁紀無以字文理更順

會以地動策免

按帝紀瓊以元嘉元年冬閏月爲司空以二年十一月免袁紀以元年十月爲司空十一月以會議梁冀事冀恨之因地動策免則在位踰月耳考元年二年皆有地動此傳亦云梁冀意以爲恨會以地動策免則與袁紀合於當年免司空也

乃封爲郟鄉侯

注元始二年更名曰郟按前志潁川郡周承休侯國元帝元始二年更名鄭公不云郟也

水經注汝水引前志同

說文邑

部云邠潁川縣考兩漢志潁川均無邠縣疑說文本云  
潁川鄉訛為縣字注誤也錢大昭補表云承休侯國鄉  
作鄉者是云承休侯國非也集韻十一唐邠城名在陽  
翟類篇引同集韻又云縣名在潁川知說文訛已久方輿紀要承休廢縣在今  
汝州治子城東元帝永元五年置平帝元始四年更名  
為邠光武改封於東郡畔觀縣曰衛公以邠縣廢入陽  
城亦據章懷注言之耳

瓊首居公位

御覽

四百二十八

汝南先賢傳曰李宣字公休為太尉黃瓊

所辟是時寒暑不和羌夷數起瓊見掾屬曰是太尉無

德願諸掾有以匡之掾東平王象對曰昔堯遭洪水之變湯有六年之旱自上聖之君誰能無此明公日昃恪勤袞職修理小掾等無以加增如此至數人瓊欣然笑次及宣乃仰曰明公被日月之衣居上司之位輔弼天子處諫爭之職未有對揚譽譽之言其所旌命不授山谷之士小掾私以於邑小掾聞之三台不明責在三公願明公深思消復災異進納忠良衆人默默慚愧

秋以地震免

按桓紀瓊爲太尉司空及罷免與傳同而袁紀七年二月云太尉黃瓊薨三月楊秉代之是謂瓊薨於太尉之

位無爲司空事及劉矩先代瓊爲太尉文疑袁紀疏漏也

天者務剛其氣君者務強其政

春秋繁露

天地之行篇

天不可以不剛王不可以不堅天不

剛則列星亂其行主不堅則邪臣亂其官故爲天者務剛其氣爲君者務堅其政

怖禍而木舌

小宰職注云木鐸木舌也文事奮木鐸武事奮金鐸然此謂懼禍不言當指舌麻木不動也吳仁傑欲改木作束非

亦取封侯

錢大昭補表下邳高遷鄉侯周永以尙書議誅梁冀侯  
一統志高遷亭在邳州界

琬傳寇賊陸梁

袁宏紀中平末涼州叛大軍出征軍調不足貨殖之徒  
多以財爲官者或起家爲州郡琬由是奏太尉樊陵司  
徒許相皆竊位懷祿苟進無恥終無匡救之益必有覆  
公折足之患宜皆罷遣以清治路軍費雖急禮義廉恥  
國之大本也苟非其選飛隼在墉爲國生事此猶負石  
救溺不可不察

威聲大震

袁宏紀是詩上遣下軍校尉鮑鴻征葛陂賊鴻因軍徵發盜官物贓過千萬琬乃糾奏其姦論鴻如法

更封陽泉鄉侯

錢大昭補表云南陽魯陽鄉張宗傳爲縣陽泉鄉佐廬江有陽泉按水經注決水東北流逕陽泉縣故城東故陽泉鄉也獻帝封黃琬爲侯國一統志陽泉故城在潁州府霍丘縣西紀要云縣西九十里錢氏何舍此而指彼也

論 忘其拘儒

方言儒輸愚也注儒輸猶懦撰也廣雅釋詁儒短也又柔也荀子修身篇偷儒轉脫注儒謂懦弱畏事

荀淑傳舉淑對策

袁紀永興二年二月癸卯京師地震潁川荀淑應詔對策也此傳作梁太后臨朝當在建和年中與袁紀異

棄官歸

御覽

四百三十四

袁山松後漢書曰荀淑與陳實交及其棄

朗陵而歸也數命駕詣之淑御慈明從叔慈抱孫文若而往實亦令元方侍側季方作食抱孫長文而坐相對怡然嘗一朝求食季方尚少跪曰謹聞大人荀君言甚



善竊聽之飯成糜實曰汝聽談解乎諶曰唯因令與二

慈說之不失一詞二慈大悅

按世說作陳太丘詣荀朗陵云云陳耀文天中記云

按本傳淑卒於桓帝建和三年或生於延熹六年相去已十三年矣則其妄自明

時人謂之八龍

羣輔錄荀氏八龍儉字伯慈儉弟緝字仲慈濟南相光

祿大夫或之父年六十六緝弟靖字叔慈太尉辟不就

年五十五靖弟燾字慈光舉孝廉年七十燾弟汪字孟

慈昆陽令年六十汪弟爽字慈明年六十三爽弟肅字

敬慈守舞陽令年五十肅弟甫字幼慈司徒掾年七十

見張璠漢紀及荀氏譜

緄

北堂書鈔謝承書曰荀緄字伯條拜尙書性明亮敏衆職以最羣僚秉機平直公卿大夫莫不憚之按袁紀尙書荀緄與李膺等皆爲鉤黨下獄誅謝承書云緄字伯條與本傳昱字伯條同蓋誤昱爲緄

曰高陽里

寰宇記荀爽兄弟八人家在長社縣東北七里地名荀村里名高陽按明統志云在許州城內

注 追號靖曰立行先生也

按高士傳潁川太守王懷亦謚之曰昭定先生

故其德爲孝

春秋繁露

五行之義

火樂木而養以陽以子而迎成養如火

之樂木也

漢制使天下誦孝經

按爽自引漢制注引王莽事以擬之非也東京制不通孝經論語不得爲吏百官志州有孝經師主監試經

諒闇之禮未嘗改移

按鄭注喪服四制云諒古作梁楣謂之梁闇謂廬也廬有梁者所謂柱楣也喪服傳旣虞翦屏柱楣注云所謂梁闇今按荀爽此言其義與鄭同漢儒解經無有異義

自杜預據高宗諒闇三年不言乃創爲心喪之說僞孔傳云諒信也闇讀爲陰默也與何晏集解孔注論語同

左傳隱元年疏引馬融亦云信默

皇侃疏或呼倚廬爲諒陰或呼梁庵

是侃仍不从孔說也  
歸其妹於諸侯也

董斯張廣博物志京房易載湯戒妹之辭曰無以天子之尊而乘諸侯無以天下之富而驕諸侯陰之从陽女之从夫本天地之義也往事爾夫必以義理

設尙主之儀

按班超傳陰城公主與嬖人處帷中使班始伏牀下尙

主之敝如此史傳不著其儀蓋鄙而略之也通典

禮十九

高宗顯慶三年詔曰比聞公主出適王妃作嬪舅姑父母皆降禮答拜此乃子道云替婦德不循何以式序家邦儀刑列辟自今以後可明加禁斷使一依禮法通鑑德宗建中元年先是公主下嫁者舅姑拜之婦不答上命禮官定公主拜見舅姑及壻之諸父兄姊之儀舅姑坐受於中堂兄姊立受於東序如家人禮王闢之澠水燕談英宗治平中徐國惠和公主下降王師約異時尙主之家例降昭穆一等以爲恭帝疾之曰此廢人倫之序不可以爲法亟命止之神宗踐祚乃詔公主出降皆

行見舅姑禮是時師約父克臣爲開封府判官中使二

就第受主見行盥饋禮成

外戚傳柴宗慶祖禹錫父宗亮宗慶尙太宗女魯國長公

主升其行爲禹錫子李遵勗尙主亦然

洪武實錄九年太師李善長長子

祺尙臨安公主儀自親迎行禮一如常式駙馬公主見太師禮畢執事者請駙馬叔姑坐駙馬公主四拜又請駙馬兄坐再拜皆坐受又請駙馬嫂立相向再拜畢還府按公主於夫之黨家人禮則尙主者居恆如夫婦之儀可知

### 與天地之宜

荀爽易本作與天地之宜今易本無天字蓋校刊人誤

以今本易與此證乃刪去天字吳仁傑因此置辯則傳  
明有天字南監本無者非爽此對與其解易不同蓋此  
據夫婦一端言之以明尙主者妻制夫違乾坤之性也  
吳仁傑乃剽拾揚雄太玄語以譏之彼固未見荀氏之  
易并不知此策意指所在亦妄矣

陽性純而能施陰體順而能化

繁露循天道養身以全使男子不堅壯不家室陰不極盛

不相接天氣先盛壯而後施精故其精固地氣盛化而  
後化故其化良

截趾適履

淮南說林所以養而害所養猶削足而適履

詩紀鄒子引古諺與

此四句同

### 董仲舒制度之別

繁露服制篇士止於帶緣散民不敢服雜采百工商賈不敢服狐貉刑餘僇民不敢服絲玄纁乘馬爽所指制度殆謂此仲舒對策只是汎論並無科指注以對策當之非也

### 逢卒爽制服三年

按慈明知禮必不爲舉主服非禮之服當是申心喪如

師耳風俗通

愆禮篇

司空袁周陽舉荀慈明有道太尉鄧



伯條舉訾孟方正二公薨皆制齊衰荀訾通儒於義足  
貴或舉者名位斥落子孫無繼多不親何乃衰乎過與  
不及古人同稱弔服之制斯近之矣如彼文則僅齊衰  
非三年然漢人多爲過禮之服如李恂郡請功曹未及  
到送喪持喪三年漢隸字源北海相景君碑陰弟子行  
三年服八十七人金石錄漢封丘令王元賞碑陰載門  
生有云右奔喪右斬衰三年趙氏譏其過禮御覽五百  
七十七 摯虞新禮議曰喪無弟子爲師服之制新禮弟子爲  
師衰臣虞謹按自古無服師之禮故子貢喪夫子若父  
而無服遂心喪三年此則懷三年之哀而無齊衰之制

也出則經居則否所謂當事加麻也此誤引檀弓注謂羣相為服居則經

出則否 先聖為禮必易從而可傳師徒義誠重而服制不

著歷代相襲不以為疑宜定新禮無服如舊晉書郭瑀傳師郭荷

荷卒服斬衰又決疑要注曰禮臣為舊君齊衰三月謂廬墓三年

策名委質稱臣吏者也見察舉而不為吏者弔服加麻

通典秀孝為舉將服議魏景元元年傅玄舉將陳公薨

以諮時賢光祿鄭小同云宜準禮而以情義斷之服弔

服加麻可也三月除之按此議近合情禮也册府元龜

六百四後唐明宗長興元年六月中書門下奏時論以

貢舉官為巨門恩門及以登第為門生門生者門弟子

也顏閔游夏等並受仲尼之訓卽是師門大朝所命春官不曾教誨舉子舉子是國家貢士非宗伯門徒今後及第人不得呼春官爲恩門師門不得自稱門生王世貞不觚錄嘉靖以前門生稱座主不過曰先生而已至分宜當國始稱老師其厚者稱夫子此後門生俱曰老師然唐宋以下雖有座主門生之稱而制服則絕矣

時人多不行妻服

讀禮通考喪服小記云爲父母妻長子禫又曰宗子母在爲妻禫則是夫之服妻亦十一月而練十三月而祥十五月而禫與父在爲母同按喪服傳父在則爲妻不杖此言適子之父主適婦之喪喪无二主故不杖不杖

則不禫凡不杖章皆不禫也小記云宗子母在爲妻禫  
賀瑒云若父歿母存則爲妻得杖又得禫小記又云父  
在庶子爲妻以杖卽位可也疏云父不主妾喪故不主  
庶婦則其禮自如杖期章昭十五年傳云三年之喪雖  
貴遂服謂惟妻與長子不以貴而降也竊疑漢時不行  
妻服殆是不杖不禫非謂全不制服也

### 行至宛陵

一統志宛陵故城在許州府新鄭縣東北史記正義云  
縣東北三十八里錢大昕曰苑與宛同此河南之宛陵  
非丹陽之苑陵

進拜司空

姚本張璠漢紀曰荀爽爲三公食不過一肉脫粟飯坐皮褥廣博物志北海耆舊傳曰公沙孚字允慈與荀爽共約出不得事貴勢而爽當董卓時脫巾未百日位至司空後相見以爽違約割席而坐

謂之漢語

前書霍光傳注引漢語

題爲新書

藝文類聚鑒誠類有荀爽女誠

悅傳人不畏死不可懼以罪

老于下篇民不畏死如之何其以死懼之

韓韶傳

注 今在兗州博城縣東北

一統志羸縣故城在泰安府萊蕪縣西北縣志云西北四十里北汶水之北俗名城子縣

鐘皓傳

頃之自劾去

裴松之注先賢行狀曰皓爲司徒掾公出道路泥濘道從惡其相洒去公車絕遠公椎軾言司徒今日爲獨行耳還府向閤鈴下不扶令揖掾屬公奮手不顧時舉府掾屬皆投劾出皓爲西曹掾卽開府門分布曉語已出者曰臣下不能自直於君若司隸舉繩墨以公失宰相

後漢書 趙壹傳 卷八  
三  
之體又不勝任諸君終身何所任耶掾屬以故皆止范  
史言自劾去然皓勸止劾者未嘗自劾去也

李膺常歎曰首君清識難尙鍾君至德可師

先賢行狀曰時郡中先輩爲海內所歸者蒼梧太守定  
陵陳稚叔故黎陽令頴陰荀淑及皓少府李膺常宗此  
三人曰荀君清識難尙陳鍾至德可師此傳及袁宏紀  
世說俱不言陳稚叔

兄子瑾

一袁紀瑾爲觀先賢行狀同

弟何期不與孟軻同耶

袁紀作弟於是何太無皂白耶

皓孫錄

先賢行狀三皓二子迪敷並以黨錮不仕錄則迪孫與

此異

陳實 傳 字仲弓

隸釋大丘長壇碑弓作躬婁機云躬是借用

為都亭刺史佐

衍刺史二字

閣本但衍刺字

亭長下有亭佐實為之

司空黃瓊辟

北堂書鈔續漢書曰舉灼然為司徒屬

按謂行義灼然晉書溫嶠傳舉



秀才  
灼然

補聞喜長旬月以暮喪去官

按蔡邕文範先生碑遷聞喜長清風暢於所漸儉節溢於監司郡政有錯爭之不從即解綬去又太丘碑云宰聞喜半歲與此事實小異

太丘長

一統志太丘故城在歸德府永城縣西北三十里

司官行部

州從事謂之州司潛夫論考績州司不治令遠詣闕史

弼傳州司不敢彈糾唐六典隋時州佐官以曹為名者

皆改爲司如司戶司  
法之類

中平四年年八十四卒於家

隸續陳實碑春秋八十三中平三年卒一統志陳實故里在許州府長葛縣西四十里今德星觀卽其遺址

其刊石立碑

洪氏所載尙有三碑足明立碑之多也明統志陳實碑在許州鄆城縣西三十五里又有祠在鄆陵縣故宅

有六子

實字紀陳氏家傳云紀諶已下八十六墓三十六碑並在長葛縣陘山之陽

號曰陳子

古文苑邯鄲滄鴻臚陳君碑乃覃思者書三十餘萬言  
言不務華事不虛設今所謂陳子者也

拜五官中郎將

碑云大將軍何進表選名儒君爲舉首起家拜五官中  
郎將到遷侍中旬有八日出相平原會孝靈晏駕賊臣  
秉政云云按以鄭君申屠蟠等傳參之則紀之解巾入  
仕在中平五年傳云董卓者非也

卽時之郡璽書追拜太僕

碑云視事未暮士女向方會刺史敗於黃巾幽冀二州

爭利其士君料敵知難不忍其民爲己致死乃辭而去  
之老弱攀轅晨夜間行寓於邳鄆之野按紀因到郡未  
嘗爲太僕所云刺史敗於黃巾者焦和也見臧洪傳幽冀二  
州爭利者袁紹公孫瓚也瓚遣青州刺史田楷拒紹平  
原屬青禍難方殷於是去郡魏志陳羣傳隨紀避難徐  
州碑得其實此傳全非也

又徵爲尙書令

碑云袁術結婚呂布君爲國深憂乃奮策出奇使絕好  
追女離逆姦謀惟帝念功命作尙書令據呂布傳說布  
絕婚者沛相陳珪初不及紀未能定其虛實也

公慙卿卿慙長

袁宏紀魏文帝嘗問羣卿何如父祖羣對曰臣祖實不言而治臣父紀言而行之至於臣羣有其言而必行按魏略羣爲魏侍中與尙書桓皆勸曹操早受漢禪羣之所慙者寧止乎此

時號三君

藝文類聚漢雜事曰太師言有德星見當有英才賢德同遊者詔下諸郡縣問潁川郡上事曰有陳太丘父子三人俱其會社按劉孝標引檀道鸞續晉陽秋則云陳仲弓從諸子姪造荀父子於時德星聚太史奏五百里

賢人聚按此並造作虛文所謂揚之可使上天非通人所取

李固傳鼎角匿犀

舊唐書馬周詣袁天綱相綱曰馬侍御伏犀貫腦兼有

玉枕又背如負物當富貴不可言

新唐書袁天綱見實軌曰君伏犀貫玉枕

輔角完起十年且顯

公卿舉固對策

袁宏紀陽嘉二年五月庚子詔舉直言對策者固與馬融張衡三人順帝覽衆對以同爲第一融之對太旨言陰陽不和由於守令用刑太急及民以食爲本農桑失

務盜賊所由起衡之對言漢初舉孝廉皆先孝行自辛卯詔書以能宣章句奏案爲限雖有至孝猶不應科郡國守相一旦免黜十有餘人又言選舉之任一歸臺閣眞僞混淆下陵土替災異所由起案融對碌碌無取衡乃歸咎於左雄爲胡廣等訟寃文人固陋如此視李公直指近倖外戚以感悟人主眞有聖凡之別矣惜李公元策袁宏范曄各以意刊削二書相校同者纔十之二三不見原本爲可恨

伏從山草

賈誼新書

七

越王之窮至乎吃

同

飲脯水山草亦謂草

莽也通鑑百姓聞孫郎至皆失魂魄長吏委城郭竄伏  
山草袁紀此句作伏在草澤

禮所不臣

白虎通王者不臣章王者所不臣者三謂二王之後妻  
之父母夷狄也妻者與己一體恭承宗廟欲得其歡心  
上承先祖下繼萬世傳於無窮故不臣也

同之中臣

胡三省曰此中臣謂中朝臣也按前書音義自大將軍  
下至給事中左右曹爲中朝臣也

表曲者景必邪



荀子王霸篇不能治近又務治遠是猶立枉木而求其景之直也

源清者流必潔

荀子君道篇君者民之原也原清則流清原濁則流濁猶叩樹本百枝皆動也

韓非外儲說右下拊其本而葉徧搖矣鹽鐵論申韓篇一節動而百枝搖

久乃得拜議郎

按前文以固爲議郎阿母宦官等陷其罪雖有命未得拜也至此因黃瓊等救乃得真拜文理甚明不必如劉

說

至白水關

明志寧羌州西南有白水自洮州衛流經此亦曰葭萌水有白水關其下流至保寧府昭化縣合於嘉陵江

注 子高曰昔堯化天下至公無私不賞而人自勸不罰而人自畏今子賞而不勸罰而不感德自此衰而刑自此作夫子盍行無留吾事悒悒然耕不顧

按莊子天地篇與注所引稍異

以固爲荊州刺史

北堂書鈔長沙耆舊傳曰太尉李公時爲荊州刺史下

後漢書 卷之九  
三十一  
辟書曰欲採明珠求之於蚌欲得名士求之文學或割  
百蚌不得一珠不可舍蚌求之於魚或百文學不出奇  
士不可捨文學求之於斗筭也由是言之蚌乃珠之所  
藏文學亦士之場矣

安國者以積賢爲道

以上語並出繁露通國身篇神彼作精

注 子方在此

按新序作大宗子敖

會稽賀純

晉書賀循傳其先慶普漢世溥禮所謂慶氏學族高祖

純博學有重名安帝時爲侍中避安帝父諱

清河孝故王慶

爲賀氏

瓊久處議郎已且十年

按黃瓊傳瓊以議郎遷尙書僕射當固對策時瓊業爲僕射救固不應固爲大匠瓊猶議郎未遷也前後文自相矛盾袁宏於前此則云朝中名臣黃瓊等深救解之於漢安元年固爲將作大匠土疏則云瓊等久處郎署已且十年比范史爲斟酌

與光祿勳劉宣土言

按此段敘述最潦草無文理旣言牧守非人三語未了

忽及君德又止二語卽云帝納其言於是下詔似略不  
經意

飛章虛誣固罪

按世以此章爲馬融所作然史不指融名又其事爲梁  
太后所寢得已袁紀則於桓帝建和元年劉文謀立清  
河王固喬皆下獄乃云從事中郎馬融主爲冀作章表  
大將軍長史吳祐傷固之枉謂融曰李公之罪成於卿  
手李公若誅卿何面目示天下范於吳祐傳亦載其事  
則融作奏卽李公被誅之事似不在質帝時且旣云飛  
章當沒其主名不可先顯撰造之人其非融作明矣

從容冷步

集韻冷女態

時年五十四

水經注江水篇李固與弟圉書曰固今年五十七鬢髮已白所謂容身而遊滿腹而去周觀天下獨未見益州耳書作五十七而史云死時年五十四必有一誤

收固二子基茲於郾城皆死獄中

監本作偃城按傳云知不免禍乃遣三子歸鄉里又云下郡收固三子則基茲之死當在漢中本郡云郾城誤固弟子汝南郭亮

御覽

三百八十五

汝南先賢傳曰郭亮童幼之年則有尙義

之心年十四始欲出學聞潁川杜周甫開精巒於長社

亮造門而師學焉朝受其業夕已精講動聲則宮商清

暢推義則尋理釋結周甫奇而偉之按如彼所云則亮

非固弟子乃博士弟子之慕義者耳

左提章鉞右秉鈇鑕

按文鉞字衍

得襚斂歸葬

水經注沔水篇李固墓在南鄭縣長柳村明統志在漢

中府成固縣西三十里唐韋臯作記

門生王成

袁宏紀作固之僕隸按下云變從受學則非僕隸也  
加梁氏則連主上禍重至矣

按徐階知此術以殺嚴世蕃寇榮不知此而速其死  
變並交二子情無適莫

華陽志變與趙元珪潁川賈偉節荀慈明張伯慎爲友  
伯慎爲潁川太守與慈明交相言論偉節與焉京師以  
爲臧否伯慎問趙元珪曰德公所言何元珪曰無言也  
伯慎追歎曰當如德公兒輩徒麤沸耳

擢遷河南尹



藝文類聚續漢書曰李燮拜京兆詔發西園錢君上封  
事上遂不發乃謠曰我府君道教舉恩如春威如虎剛  
不吐弱不如愛如母訓如父

有同歲生

後世所云同年生柳敏碑縣長同歲健爲趙臺念素帛  
之義

大署帛於其背曰

按司救注加明刑者去其冠飾而書其表惡之狀著之  
背也

杜喬傳以無功並封喬上書諫

袁宏紀喬書曰大將軍梁冀兄弟姦邪傾動天下皆有  
正卯之惡未被雨觀之誅而橫見式敘各受封爵天下  
惆悵人神共憤按袁紀喬上書諫在己爲太尉之後考  
帝紀喬以建和元年六月代胡廣爲太尉而袁紀梁氏  
五侯封於元年七月則喬已遷太尉時也當從袁紀此  
傳下有建和元年蓋衍

但策免而已

按帝紀喬以九月免太尉十一月劉文事起乃與李固  
同誅故考異謂此云策免誤袁紀劉文事在九月於是  
誣太尉杜喬故太尉李固與文通謀皆下獄誅此傳策

免在清河王事起後則與袁紀合未知孰是然傳前已

言以地震免又自相牴牾也紀作劉文傳作劉簡

送喬喪還家

一統志杜喬墓在彰德府林縣北二十五里明統志云

在磁州北二十五里姚村

匡初好學

初當是幼之誤

吳祐傳恢欲殺青簡

御覽六百風俗通曰凡作簡者皆於火上炙乾之陳楚

問謂之汗汗者去其汗也吳越曰殺殺亦治也劉向為

孝成皇帝典校書籍二十餘年皆先書竹爲易刊定可繕寫者以上素也由是言之殺青者竹斯爲明矣今東觀書竹素也殷敬順列子釋文謂汙簡刮去青皮也

以寫經書

北齊書郎基傳基爲潁川郡守嘗語人云仕宦之所木枕亦不須作況重於此乎惟頗令人寫書潘子義曰在官寫書亦是風流罪過基答曰觀過知人斯亦可矣册府元龜八百四十九蕭廩從父倣倣字思道相德宗至番禺多美穀楮公暇出俸買牋管遣吏鈔補家書之闕者廩諫曰大人置書他日歸國慮爲風雨所損必貯於篋笥人或見

譏何以自雪此亦清而不慎也做遂止

世系表虞字當侯翰事中與

吳祐諫正同

注 桂陽甲騎二也

水經注作騎田

注 九真都龐三也

水經注桂陽南平縣都山即部龍之嶠五嶺之第三嶺  
趙一清曰九真郡有都龐縣而桂陽之部龍乃嶺嶠之  
名王象之輿地紀勝曰山之絕頂曰都逢土人語訛曰  
龐也以都逢為土音山之絕頂之說殆因嶺嶠而附會  
此與九真之都龐無涉鄧紀誤

膠東侯相

通志膠東城在平度州城內

明府雖加哀矜

縣令爲明府始見於此容齊隨筆唐人呼縣令爲明府未之考也

延篤傳 穎川唐溪典受左氏傳

御覽六百十九先賢傳曰延篤從廣漢李慶受左氏與注引

先賢行狀事同疑廣漢乃唐溪之訛而又衍一李慶姚之駟引藝文類聚先賢行狀作唐溪季度知李慶果誤而如欲分其大較

而如猶言乃若檀弓而曰然注云猶乃

致之者根也

文子上德篇木大者根音樞

公劉曾參是也

謂公劉行葦之仁注不得其解

坐於容堂

容本作客者非按爾雅容謂之防郭曰形如今牀頭小  
曲屏風射者所以自防鄭注鄉射禮云容謂之乏所以  
為獲者禦矢也劉熙釋名墉容也所以蔽隱形容也幢  
容也施之車蓋童童然以隱蔽形容也是則隱蔽自障

者皆謂之容古者宮室自半已前虛之謂之堂

士昏禮棟北一

楹下有室戶中脊為棟棟南一架為前楹凡五架半已後實之謂之室堂前有

屏蔽之設故曰容堂又堂是行禮之處容堂猶禮堂也

注 說文曰筑五弦之樂也

按說文筑以竹曲五弦之樂也史紀索隱云筑似琴有弦以竹擊之取以為名

多所駁正

隋志戰國策論一卷延篤撰然不載其左傳解隋志佚之也

凡二十篇云



新唐書藝文志延篤集二卷

史弼傳 被一切詔書當舉孝廉

謂大郡太守視事未及一暮皆得舉孝廉小郡亦得歲舉也陳蕃傳詔下州郡一切皆得舉孝廉茂才桓帝時如此詔書非一度也

并求假鹽稅

按河東有兩鹽池則後漢仍榷其稅

昔文王牖里

明統志羨里在彰德府湯陰縣北九里一名牖城又名防城

盧植  
傳 涿人也

名勝志盧植故宅在涿州東十五里地名盧家溲土壤肥饒子孫世居焉

能飲酒一石

按鄭盧二大儒俱能飲酒一石然古量三而當今之一

不足

李時珍本草古之一升即今之二合半是四而當一也

唐六典三斗爲一大

斗則古三斗當唐一斗也定八年傳正義魏齊斗稱於

古二而爲一周隋斗稱於古三而爲一日知錄宋沈括

筆談曰子受詔考鍾律鑄渾儀求秦漢以來度量計六

斗當今之一斗七升九合秤三斤當今十三兩是宋時

權量又大於唐也元史言至元二十年頒行宋文思院  
小口斛又言世祖取江南命輸米者止用宋斗斛以宋  
一石當今七斗故也是元之斗斛又大於宋也

注 隣人失羊不還請吾兄追之

按列女傳言隣人女奔隨人亡其家倩吾兄行追之逢  
霖水出溺流而死漆室琴苑要錄作次室

楚人脅比

錢大昕曰公羊傳靈王作乾谿之臺三年不成楚公子  
棄疾脅比而立之章懷注不引公羊而引左氏周走而  
呼非其義也

轉爲侍中

高誘淮南子敘曰誘少從故侍中同縣盧君受其句讀  
誦舉大義

遂隱於土谷

寰宇紀續漢書曰植隱上谷軍都山立黌肆教授好學

者自遠方而至

明統志軍都山在昌平州西北二十里盧植隱此

儉葬於土穴

北堂書鈔袁山松書曰尙書盧植將終敕其子彊以禪  
葬以土穴其子從之一統志盧植墓在涿州東何邨里  
土人呼爲南臺

蠶蠶起懷

淮南俶真蜂蠶螫指而神不能愴也愴定晉書劉毅傳蜂

蠶作於懷袖勇夫爲之驚駭出於意外故也

雷霆駭耳

六韜軍勢疾雷不及掩耳

趙岐傳 娶馬融子女

按決錄注岐娶敦女實融之從父妹傳云兒女誤

不與融相見

淮南說山行不合趨不同對門不通此之謂也

其後疾瘳

御覽

九百九十六

趙岐藍賦序曰予就醫偃師道經陳留此

境人皆以種藍爲業藍田彌望黍稷不殖慨其遺本遂作賦一章

皮氏長

元和志後魏太武帝改皮氏爲龍門縣新唐志憲宗初屬河中府今爲河津縣屬絳州

京兆尹延篤復以爲功曹

魏志注魚豢魏略云延熹中唐衡弟爲京兆虎牙都尉爲郡功曹趙息所輕侮衡弟甚恚欲滅諸趙及爲京兆尹於是捕諸趙尺兒以上皆殺之時息從父岐爲皮氏

長聞有家禍因從官舍逃走之河間變姓字又轉詣北海與此傳岐先棄官歸爲郡功曹者異

注 下方羅趙有餘也

按衛恆草書勢云羅叔景趙元嗣與伯英並時見稱於西州而矜巧自與衆頗惑之故英自稱云云如恆言其書亦不爲拙

視子非賣餅者

北堂書鈔魏略云着絮巾布袴賣餅藝文類聚三輔決錄注曰孫嵩問曰自有餅耶曰販之嵩曰買幾錢賣幾錢岐曰買三十賣三十嵩曰視處士之狀非賣餅者

藏岐複壁中數年

趙岐孟子題辭曰余知命之際嬰戚於天遭屯離蹇詭  
姓遁身十有餘年嘗息肩弛擔於濟岱之間或有溫故  
知新雅德君子矜我劬瘁睠我皓首訪論稽古慰以大  
道余困吝之中精神遐漂靡所濟集聊欲係志於翰墨  
得以亂思遺老也後世謂孟子章句是複壁中作以此  
題辭知之

爲禦寇論

冊府元龜

九百九十一

唐儀鳳三年延州人魏眞宰上封事

曰昔趙岐撰禦寇之論山濤陳用兵之本皆坐運帷幄



暗合孫吳

因其上為青州刺史

魏略云頃之賓碩病亡岐在南為行喪也

三輔決錄

魏志注趙岐作三輔決錄恐時人不盡其意故隱其書

惟以示嚴象

皇甫規傳皆由邊將失於綏御

王符論實邊曰前羌始叛器械未備或持銅鏡以蒙兵

或負板案以類楯誠易制耳而將帥皆怯劣軟弱不敢

討擊但坐調文書以欺朝廷實殺民百則言一殺虜一

則言百又放散錢穀殫盡府庫乃復从民假貸強奪財  
貨千萬之家削身無餘隨以死亡其事跡與規所陳不  
異

鑿墉之趾以益其高

文子上義篇不廣其基而增其高者覆揚子太玄大道  
次八豐牆峭阯三歲不築崩

諸種陸梁

莊子馬蹏翹足而陸音義司馬彪云陸跳也此陸梁猶  
跳梁也

至冬羌遂大合朝廷爲憂三公舉規爲中郎將

袁紀延熹四年六月羌寇金城安定漢陽武威殺吏民  
 中郎將皇甫規討羌大破之帝紀四年十一月中郎將  
 皇甫規擊破之此傳云延熹四年秋規上疏自効與帝  
 紀合較袁紀差半年

規親入庵廬

釋名草圓屋曰蒲又謂之庵庵奄也所以自覆奄也廣

雅釋室廡廡庵也名義考通俗文屋半曰廡廡鄭注喪服四制閣謂

廬也閣庵字同集韻二十二覃庵庵閣陰同李壁王荆

公詩注田廬卽今覩穀寮也僅可容身而宿轉移無常

所云菴廬殆是此也王念孫廣雅疏證菴廬卽幕也

完封寫之權門

說文寫置物曲禮正義寫謂倒傳之也胡三省曰此言以朝廷供軍之金幣不發封而送權門也

威明欲遊第仕塗

風俗通

過譽篇

規欲退避弟弟實雋德不患無位而徒闖

茸何所堪施則規有弟也不當作第然官之伐閱亦謂之第北齊文苑傳樊遜曰家無蔭第不敢當此又曰門族寒陋訪第必不成義亦可通

乃先自上言臣薦故大司農張奐

按風俗通以爲懼見及因先自上此不樂成人之美也

當從此大司農彼作太常考奐被黨罪時已轉太常當從應劭

規對曰

袁紀對策與荀爽同應詔

三斷大獄

注以梁冀鄧萬世李膺等爲三按膺等黨事此時猶未斷六月卽被赦當謂成瑨劉瓚之獄規於下更云至於鉤黨之覺事起無端明不在三大獄之數

再誅外臣

五年殺南郡太守李肅八年殺蒼梧太守張敘桂陽太

守任滄

卒於穀城

一統志穀城故城在洛陽縣西北

二十七篇

新唐書藝文志皇甫規集五卷

張奐傳 敦煌酒泉人也

錢大昕曰酒泉郡名非縣名當作淵泉胡三省注云奐

敦煌淵泉人胡所見本尙未誤也漢書敦煌郡有淵泉

縣晉志作深泉蓋避唐諱章懷本亦當作深後人妄改

爲酒耳按續志淵泉作拼泉西域見聞錄云我朝於嘉

峪關之西二百九十里設玉門縣治又西三百里設安

西府治附郭之縣曰淵泉亦取敦煌故縣名

注永州晉昌縣永當

作瓜監本閣本皆誤

### 進屯長城

元和志秦長城在夏州德靜縣西二里一統志在榆林

府西

### 因據龜茲

今榆林府榆林縣是漢龜茲縣也按奐爲安定屬國治

本在三水縣龜茲乃上郡屬國都尉所治也

### 金鏃八枚

集韻據環屬戎夷貫耳通作鑿韻會文選云鑿耳之僕則金鑿者金鑿耳

而召主簿

按水經注主簿張祈

時休屠各

休官屠各皆羌胡名晉書匈奴傳北狄入居塞者有屠

各等十九種屠各最豪貴為單于統領諸種

通鑑新準遣使告同

州刺史李矩曰

劉淵屠各小醜通鑑晉太元十七年休官權干成據顯

親自稱秦州牧胡三省注休官雜夷部落之休又元帝

永昌元年休屠王石武以桑城降趙則又有休屠種也



引屯赤坑

方輿紀要赤坑在榆林鎮東北境

凡二月五月產子至悉殺之

論衡四諱篇俗諱舉正月五月子以爲正月五月子殺  
父與母不得已舉之父母禍死按孟嘗君傳田嬰曰五  
月子者長與戶齊將不利其父母索隱引風俗通曰俗  
說五月五日生子男害父女害母自田文以至王鎮惡  
皆有是說陸啟滋北京歲華記五月五日民間是日生  
子束一本或荆條祭於堂斬其木五六尺許  
祝曰如是北史煬帝蕭皇后傳江南風俗二月生子者  
止長抵戶  
不舉論衡誤二月爲正月也

拜奐爲護匈奴中郎將

藝文類聚奐與延篤書曰惟別三年無一日之忘京師  
禁急不敢相聞豈不懷歸畏此簡書年老氣衰智盡謀  
索每有所處違宜失便比爲車兒所警中爲馬循所困  
眞欲入三泉之下復鎮之以大石厄乎此時也且太陰  
之地冰厚三尺木皮三寸風寒慘冽剝肌傷骨自非老  
憊者所堪而復加之以師旅因之以饑饉衆難聚集不  
可一二言也聾盲日甚氣力寢衰神耶當復相見者從  
此辭矣按袁紀奐以南單于車兒不能治國事上言更  
立左鹿蠡都紺爲單于在永康元年書中云爲車兒所

警當指此北堂書鈔張奐與崔子真書曰僕以元年到任有見兵二百馬如殺羊才如錐鉄盾如榆

葉此蓋承壽

元年時事

### 園殿祔

一統志殿祔故城在耀州東一里

### 牢以釘密

謂棺釘也魏志王淩傳注淩自知罪重試索棺釘以觀

太傅意司馬懿為太傅太傅給之南史徐勉傳時人間喪事多

不遵禮朝終夕殯相尚以速勉上疏曰屬纊纔畢灰釘

已具檀弓疏古棺木無釘故用皮束合之按喪大記君

裏棺用朱綠用雜金錯大夫裏棺用玄綠用牛骨錯疏

云裏棺謂以繒貼棺裏也朱繒貼四方綠繒貼四角錯釘也以琢朱綠著棺然則古時棺外雖用束衽棺裏亦以釘密也

二十四篇

唐藝文志張奐集二卷

芝及弟昶並善草書

晉書衛恆傳四體書勢曰漢興而有草書不知作者姓名至章帝時齊相杜度號善作篇後有崔瑗崔實亦皆稱工張伯英者因而轉精甚巧凡家之衣帛必書而後練之臨池學書池水盡黑下筆必爲楷則號悤悤不暇

草書寸紙不見遺至今世尤寶其書章仲將謂之草聖  
張懷瓘書斷曰後漢張伯英損益伯度章草亦猶逸少  
增減元常真書其草書急就章字皆一筆而成合於自  
然可謂變化之極又利字文舒尤善章書類伯英時人  
謂之亞聖

登樓自燒而死

事詳魏志

段熲出湟谷擊破之

郡國利病書湟谷在西寧衛治西南段熲破羌胡處

復戰於羅亭

郡國利病書羅亭在積石山北

明統志積石山在河州衛城西北七十里

攻沒鉅鹿隄

前志張掖郡日勒縣下都尉治澤索谷此塢亦應在是河首積石山

此大積石山也一統志在西寧府邊外西南五百三十餘里黃河北岸

擊石城羌

水經注河水東經石城南謂之石城津一統志石城在蘭州西北

千六百人

水經注引段熲擊羌於石城投河墜阬而死者八百餘人與此異

屯聚白石

注以爲白石山非也山在今蘭州府狄道州東爲內地傳不當云進擊也一統志白石故城在河州西南金城郡屬縣也

圍允街

一統志允街故城在涼州府平番縣南

於鸞鳥

一統志鸞鳥故城在涼州府武威縣南

從彭陽直指高平

方輿紀要彭陽城在平涼府鎮原縣東八十三里一統志高平故城今固原州治自魏至唐原州皆治此而宋以後之原州則今之鎮原縣漢臨涇縣地也

戰於逢義山

通典高平縣有逢義山一統志云今固原州志不載或以爲卽州北九十里須彌山

張鏃

通鑑作長鏃

出橋門至走馬水上尋聞虜在奢延澤



寰宇記延州門山縣縣北有山其形如門因以爲名明  
統志橋山在延安府中部縣治北下有沮水或云水從  
山底經過如橋按水經注二奢延水又東走馬水注之  
水出西南長城北陽周縣南橋山山上有黃帝冢橋門  
卽此也一統志走馬水在延安府安定縣東北流經青  
澗縣入綏德州東北流入長城又東北注奢延水奢延  
水卽無定河自榆林府流入逕米脂縣西又東南流逕  
綏德州城東又逕青澗縣東北入黃河

虜走向洛川

一統志洛河在榆林府定邊縣東南又東南流入延安

府保安縣界通志洛水在縣東南一百五十里源出冢  
嶺下琉璃廟石縫中東南流逕頁水川合鐵鞭城水入  
保安界

令鮮水上

注云水在今甘州張掖縣界胡三省辨誤云段頰之擊  
羌也先破之於高平之逢義山遂追之出上郡橋門與  
戰於奢延澤落川令鮮水上連破之又破於靈武谷奢  
延澤在上郡奢延縣西南靈武谷在北地靈武縣則所  
謂令鮮水當在奢延澤西南靈武谷東北非張掖之羌  
谷水明矣段頰前後與羌戰皆在安定北地上郡界張

掖遠在河西頽兵焉能至彼乎余按段頽先討西羌後  
討東羌胡氏所辨是也明志榆林衛河套西有令鮮水  
已堙方輿紀要令鮮水在廢夏州西

### 靈武谷

注云在今靈州懷遠縣西北胡三省云前志北地郡靈  
武縣有靈武谷當在此縣界按元和郡縣志廢靈武城  
在懷遠縣東北隔河一百里其城本蒙恬所築古謂之  
渾懷彰然此靈武谷當卽其處胡三省旣知漢縣有靈  
武谷而復引魏收地形志雍州咸陽郡靈武縣以當之  
反以章懷注爲誤是以僞置爲漢縣也一統志莎羅摸

山在寧夏府靈朔縣西南一百里近賀蘭山靈武口蓋  
卽靈武谷也

到涇陽

元和志漢涇陽縣在今平涼府縣西四十里

去羌所屯凡亭山

地形志平涼郡鶉陰縣有凡亭方輿紀要凡亭卽瓦亭  
之訛亦謂之東瓦亭在平涼府華亭縣西北百八十里  
按羌所屯者乃西瓦亭在今秦州秦安縣東北二百里  
射虎谷

明志秦州治西有射虎谷

更封新豐縣侯

按水經注云新豐靈帝建寧三年改為都鄉封段熲為  
 侯考郡國志無此文熲以桓帝時封都鄉侯至此以功  
 改封新豐縣侯酈氏誤也長安志又云漢靈帝改封熲  
 陰槃侯陰槃城在臨潼縣東北四十里按寰宇記云漢  
 靈帝末移安定郡陰槃縣寄理於新豐故有陰槃之名  
 耳

三年春徵還京師

藝文類聚東觀記曰熲徵還京師乘輕車介士鼓吹曲  
 蓋朱旗騎馬殷天蔽日連騎相繼數十里

姚之駟本東觀記於殷天

蔽日下有鉅傳金  
鼓雷震動地八字

後漢書疏證卷八

浙江書局刊

〇〇〇

〇〇〇

浙江書局刊

章炳森校

盛元校

丁立誠校